

Uunga siunnersuut: Tarnimikkut nappaatilinnik kiffaanngissusiaaneq allatigullu pinngitsaaliissummik iliuseqarneq pillugu Inatsisartut Inatsisaata allanngortinnera pillugu Inatsisartut inatsisaat nr. xx, xx. xxx 2015-imeersoq
(Pinngitsaaliissummik katsorsarneqarnermi eqqarsarfissinneqarneq, Napparsimasunut siunnersortinik atorfinitsitsisarnermi aalajangiinissamut pisinnaatitsineq, Maalaaruteqartarneq aamma eqqartuussivilersuussisinnaaneq)
(Peqqissutsimut aamma Nunat Avannarliit Suleqatigiinnerannut Naalakkersuisumit saqqummiunneqartoq)

pillugu

Ilaqutariinnermut Peqqissutsimullu Ataatsimiititaliap isumaliutissiissutaa

Siunnersuutip aappassaaneerreqarnerani saqqummiunneqartoq

Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Tillie Martinussen, Demokraatit, siulittaasoq
 Inatsisartunut ilaasortaq Jess Svane, Siumut, siulittaasup tullia
 Inatsisartunut ilaasortaq Laura Táunajik, Siumut
 Inatsisartunut ilaasortaq Vivian Motzfeldt, Siumut
 Inatsisartunut ilaasortaq Aaja Chemnitz Larsen, Inuit Ataqatigiit
 Inatsisartunut ilaasortaq Peter Olsen, Inuit Ataqatigiit, sinniisussaq
 Inatsisartunut ilaasortaq Aqqaluaq B Egede, Inuit Ataqatigiit, sinniisussaq

UPA 2015-imi ulloq 18. Marts 2015-imi siullermeerinerup kingorna siunnersuut ataatsimiititaliamit sukumiisumik misissorneqarpoq.

Siunnersuutip imarisaa siunertaalu

Siunnersuut tarnimikkut nappaatillit kiffaanngissusiianeqartarnerat allatigullu pinngitsaaliissummik iliuseqarneq pillugu Inatsisartut inatsisaat nr. 24, 3. december 2012-meersumut atuuttumut allanngutissatut siunnersuutaavoq.

Tarnimikkut nappaatillit pillugit pissutsit arlallit nukittorsarneqarnissaat siunnersuuteqarnermi siunertarineqarpoq. Tarnimikkut Nappaatillit Maalaarutaannik Aalajangiisartut aalajangigaat pillugit maalaarutit Kalaallit Nunaanni eqqartuussivimmi eqqartuussisumit suliarineqartalernissaat siunnersuutigineqarpoq. Aammattaaq napparsimasup katsorsartinnissaminut akuersisinnaanissaa siunertaralugu eqqarsarnissamut naleqquttumik

piffissaqartitsisoqassasoq (taamaattoq sivisunerpaamik ullut pingasut) siunnersuutigineqarpoq. Aammattaaq pinngitsaaliilluni iliuutsinut nalunaarsuivik napparsimasoq pillugu nalunaarsukkanik siunissami ilaqartinneqartalissasoq siunnersuutigineqarpoq. Napparsimasunut siunnersortinngortitsinissaq eqqarsaatigineqartoq pillugu napparsimasoq siunissami oqaaseqarnissamut periarfissinneqarnissaa aamma siunnersuutigineqarpoq. Aammattaaq siunnersuutigineqarpoq naammagittaalliutinut aalajangeereernissamut utaaqqimaartinneqartunut tunngatillugu Tarnimikkut Nappaatillit Maalaarutaannik Aalajangiisartut kingusinnerpaamik naammagittaalliuutip tigneranit ullut arfineq marluk qaangiutsinnagit aalajangiisassasut.

Siunnersuutip Inatsisartuni siullermeerneqarnera

Saqqummiussissutip Peqqissutsimut Naalakkersuisuugallartumit saqqummiunneqartup saniatigut partiinit: Siumumit, Inuit Ataqtigiinnit, Demokraatinit, Partii Naleqqamit aamma Atassumit oqaaseqartartut allakkatigut saqqummiussisutaat saqqummiunneqarput.

Allannguutissatut siunnersuutit tamanit isumaqatigineqarput.

Tarnimikkut napparsimasut atugaat siullermeerinermi sukumiinerusumik eqqartorneqarput.

Tarnimikkut nappaatilinnut tunngatillugu nalunaarut 2010-meersoq oqallinnermi eqqaaneqarpoq, suliassaqarfimmilu nalunaarusiap nutarterneqarnissaa pisariaqartinneqarnerasoq isumaliutigineqarluni. Matumani inuit piginnaatitaaffii tarnimikkullu napparsimasut atugaasa kiisalu ilaqutaasut eqqarsaatigalugit nutartikkamik nalilersuisoqarnissaa siunertarineqarluni. Tarnimikkut napparsimasut immikkut atugaat eqqarsaatigalugit ineqarnerannut tunngasut, nakkutilliineq aammalu sulisut ilinniarsimasut minnerunngitsumillu oqaatsit atorneqartut atorlugit oqaloqatigineqartarnissaasa pingaaruteqarnera eqqaaneqarput, matuma ataani tarnimikkut napparsimasut katsorsarneqarnissaasa qulakkeerneqarnissaanut suliniutit ilanngullugit.

Tamanna tunngavigalugu siunnersuut Ilaqutarinnermut Peqqissutsimullu Ataatsimiititaliamut suliarineqaqqittussanngorlugu innersuunneqarpoq.

Tusarniaanermut akissuteqaatit

Siunnersuummut nalinginnaasumik nassuiaatini tusarniaariaaseq nassuiarneqarpoq. Tusarniaariaaseq atorneqartoq aamma tusarniaanermut akissutit pillugit allakkiaq saqqummiunneqartoq ataatsimiititaliamit immikkut maluginiarneqarput.

Ataatsimiititaliap siunnersuummik suliarinninnera

Siunnersuummik matuminnga ataatsimiititaliap suliarinninnermini tarnimikkut nappaatillit pillugit nassuiaat 2010-meersup (UPA 2010/99) tassani innersuussuterpasuit ilanngullugit misissornissaannut immikkut tunngavissaqarsimavoq.

Tarnimikkut napparsimasut pillugit nalunaarutip 2010-meersup 2012-imi killiffissiuilluni malitseqartitsinermi suliap ingerlanneqarnissaanut 2013-miit 2017-imut pilersaarusiortoqarsimasoq ataatsimiititaliamit aammattaaq paasineqarpoq.

Matumunnga atatillugu erseqqissaatigineqassaaq Kalaallit Nunaanni qarasaasiaq atorlugu tarnimikkut nappaatilinnut katsorsaasarnermut piviusunngortitsinissamut periusissat pillugit siunnersuutitalerlugu nassuiaammik 2012-imi aamma suliaqartoqarsimammat.

Siunnersuutip siullermeerneqarnerani kalaallisut saqqummiussissummi oqaasertat kukkuneqartut malugineqarsimasoq Peqqissutsimut Naalackersuisuugallartup 27. marts 2015-imi allakkatigut paasissutissiissutigigaa ataatsimiititaliamit maluginiarneqarpoq. Paasissutissiissutigineqartoq naapertorlugu saqqummiussissummi kukkuneq "Nunatta Eqqartuussivia" allasimasoq "Kalaallit Nunaata Eqqartuussivia"-nik allasimasussaagaluarpoq. Kukkuneq inatsisissatut siunnersuutip oqaasertaani takuneqarsinnaanngilaq.

Tarnimikkut nappaatilinnik kiffaangissusiianeq allatigullu tarnimikkut nappaatilinnik pinngitsaaliissummik iliuseqarneq pillugit Inatsisartut inatsisaannik nr. 24, 3. december 2012-imi Inatsisartut akuersimmata inatsisitigut sinaakkutissat pillugit kaammattuutit 2010-meersut piviusunngortinneqarsimammata ataatsimiititaliamit naammagisimaarlugu oqaatigineqassaaq. Siunnersuummi matumani tarnimikkut napparsimasut atugaasa nukittorsarniarneqarnissaat pillugu siunertarineqartoq ataatsimiititaliamit nuannaarutigineqarpoq, pineqartumilu inatsisitigut sinaakkutit matumani ilanngullugu napparsimasut piginnaatitaaffiisa nukittorsarneqarnissaannut tunngatillugu pitsaasup tungaanut alloriarnertut isigisariaqartariaqarluni.

Tarnimikkut napparsimasut pillugit nalunaarummi 2010-meersumi kaammattuutigineqartut 2012-imilu killiffissiuilluni malitseqartitsinerit ataatsimiititaliamit ingerlaavartumik malinnaavigineqassapput tamatumunngalu atatillugu oqaloqateqartarneq ingerlattuarumallugu. Kaammattuuterpassuusut takorluugarpassuusullu aammalu tarnimikkut napparsimasunik sullissinerup nukittorsarneqartuarnissaa ineriartortinneqartuarnissaalu siunertaralugit sulisoqartoq ataatsimiititaliamit maluginiarneqarpoq. Pineqartoq suliniutillu arlalinnut sammisuupput taamaattoq allaaserineqarluarsimallutik. Kingusinnerpaamik 2016-imi imaluunniit 2017-imi killiffissiuinerup nutarterneqarnissaa ataatsimiititaliap kaammattuutigissavaa, taamaaliornikkut kaammattuutit piviusunngortinneqarnissaannut assiliaq ersarissoq ataatsimoortorlu malinnaavigineqarsinnaaqullugit. Innarluutillit pillugit

isumaqatigiissut naapertorlugu tarnimikkut nappaatilinnut piumasaqaatit qanoq naammassineqarsinnaanersut nassuiaammi immikkut ilanngussinissamut ilassusiisoqarnissaa ataatsimiititaliamit kissaatigineqarpoq.

Innarluutillit pillugit isumaqatigiissut nunatsinnut atuuttuummat aammalu innarluutillit pillugit isumaqatigiissummi inuit "sivisuumik tarnimikkut piginnaasakillissimasut" aamma ilanngullugit pineqarmata ataatsimiititaliamit eqqumaffigeqquneqarpoq.

Inissiat aalajangersimasut tarnimikkut nappaatilinnut innersuunneqartannginnissaat pillugu Kommuneqarfik Sermersuumut Ineqarnermut Naalakkersuisoqarfik 2014-imi nalunaaruteqarnera Inatsisartut Ombudsmandiata isornartorsiuneranik kinguneqarpoq.

Ombudsmandi matumani pingaartippaa atugassarititaasut pineqartut - tarnimikkut napparsimasunut ataatsimut isigalugit - ingerlatsineq pillugu inatsiseqarnermi naligiimmik pinnittusaaanermik akerliusutut isumaqarfigineqarsinnaammata. Ombudsmandip aammattaaq oqaatigaa naligiimmik pinnittusaaaneq tamanna innarluutillit pillugit isumaqatigiissut tunngavigalugu paasineqartussaammat.

Innarluutillit pillugit isumaqatigiissutip atuutilersinneratigut nunatta innuttaasut inatsisitigut pisussaaffigaa inatsisit allaffissornermilu sullissinerit isumaqatigiissummi piumasarineqartutut naleqqussassallugit.

Tamanna tunngavigalugu innarluutillit pillugit isumaqatigiissummut tunngatillugu pisussaaffiit sukumiinerusumik qulaajarneqarnissaat ataatsimiititaliamit pingaaruteqartutut isumaqarfigaa. Inuttut piginnaatitaaffiit takkuitsoorneqarsinnaanera pinngitsoortinneqarnissaa qulakkeerumallugu inunnut tarnimikkut nappaatilinnut inuttut pisinnaatitaaffiit qulakkeerneqarnissaasa nassuiarneqarnissaat ataatsimiititaliamit inassutigineqarpoq. Matumani piginnaatitaaffiit taakku inatsisitigut qulakkeerneqarnissaat malitinneqarnissaallu qulakkeerneqarnissaa siunertarineqarpoq.

Innarluutillit pillugit isumaqatigiissutip atuutilersinneqarnissaanut iliuusissatut pilersaarut qaqugu naammassineqassanersoq tamanullu saqqummiunneqarnissaa pillugu Naalakkersuisut nalunaaruteqarnissaat ataatsimiititaliamit kissaatigineqarpoq.

Siunnersuutip aningaasaqarnikkut kingunerisassai

Siunnersuutip piviusunngortinneqarneratigut aningaasatigut kingunerisassai siunnersuummi nalinginnaasumik oqaaseqaatini allaaserineqarput. Siunnersuutigineqartoq pisortanut aningaasaqarnikkut kinguneqarnavianngitsoq matumani oqaatigineqarpoq.

Ataatsimiititaliap inassuteqaataa

Siunnersuut ilusimisut iluseqartillugu akuersissutigineqassasoq ataatsimiititaliap isumaqatigiittup inassutigaa

Taama oqaaseqarluni isumaliutissiisummilu oqaatigineqartunik paasinnilluni siunnersuut ataatsimiititaliap aappasaaniigassanngortippaa.

Tillie Martinussen,
Siulittaasoq

Jess Svane, siulittaasup
tullia

Laura Táunajik

Vivian Motzfeldt

Aaja Chemnitz Larsen

Peter Olsen

Aqqaluaq B Egede